



## **TEKS UCAPAN**

**YB TUAN HJ KHALID BIN ABD. SAMAD  
MENTERI WILAYAH PERSEKUTUAN**

**SAMBUTAN HARI WILAYAH  
PERSEKUTUAN 2020 PERINGKAT  
PLANMALAYSIA**

**20 FEBRUARI 2020 (KHAMIS)  
12.30 TENGAH HARI**

**DEWAN SERBAGUNA,  
KEMENTERIAN WILAYAH PERSEKUTUAN**

# Assalamualaikum

# Warahmatullahi

# Wabarakatuh dan Salam Sejahtera.

# (Salutasi)

# PENDAHULUAN

1. Syukur kita ke hadrat Allah SWT kerana dengan limpah kurnia-Nya pada hari ini, dapat kita bersama-sama berkumpul dalam majlis sambutan **Hari Wilayah Persekutuan Tahun 2020, Peringkat PLANMalaysia**. Saya turut ingin mengalu-alukan kehadiran guru-guru dan para pelajar yang mewakili sekolah Menengah di ketiga-tiga Wilayah Persekutuan Kuala Lumpur, Labuan dan Putrajaya, Terima kasih

kerana hadir sama menjayakan majlis pada petang ini. **Selamat datang** ke Kementerian Wilayah Persekutuan.

2. Kehadiran para pelajar dan guru-guru pada petang ini adalah bertepatan dengan tema sambutan Hari Wilayah Persekutuan Tahun 2020 Peringkat PLANMalaysia iaitu '**PLANMalaysia Bersama Komuniti**'. Tema tersebut diangkat selaras dengan usaha Kementerian untuk memfokuskan peranan komuniti di dalam perancangan pembangunan berteraskan **konsep 'Leaving No One Behind'** yang menjadi aspirasi kepada setiap polisi dan tindakan Kementerian dalam

melaksanakan proses perancangan pembangunan mampan bagi negara ini.

## **PEMBENTUKAN PERSEKUTUAN**

## **WILAYAH**

*Khusus buat anak-anak yang saya kasihi sekalian,*

3. Seperti mana yang anak-anak sekalian maklum, pada 1 Februari setiap tahun, kita akan menyambut Hari Wilayah Persekutuan. Tahu tak kenapa kita diberikan cuti? Cuti yang diberikan itu adalah supaya kita seluruh warga Kuala Lumpur, Putrajaya dan Labuan dapat meraikan pembentukan ketiga-tiga

wilayah ini sebagai satu ‘**Wilayah**’ yang dikenali sebagai **Wilayah Persekutuan**.

4. Wilayah Persekutuan ini adalah wilayah yang ditadbir secara langsung oleh Kerajaan Persekutuan Malaysia iaitu di bawah Kementerian Wilayah Persekutuan. Tidak seperti negeri-negeri lain di Malaysia, Wilayah Persekutuan tidak diperintah oleh kerajaan negeri, tetapi ditadbir dan diperintah terus di bawah Yang di-Pertuan Agong.

*Hadirin yang saya hormati sekalian,*

5. Tanggal 1 Februari Tahun 1974, telah tercatatnya satu sejarah penting

buat Negara, bila mana termeterainya satu perjanjian di antara Kerajaan Persekutuan dengan Kerajaan Negeri Selangor. Sultan Selangor pada ketika itu telah melakukan pengorbanan besar demi kepentingan negara kerana sanggup menyerahkan kawasan Kuala Lumpur kepada Kerajaan Persekutuan untuk dijadikan **pusat pentadbiran dan Ibu Negara Malaysia.**

6. Satu perjanjian yang dinamakan **Perjanjian Kuala Lumpur (Kuala Lumpur Agreement)** telah ditandatangani oleh Yang di-Pertuan Agong bagi pihak kerajaan pusat dan Sultan Selangor ke-7 bagi pihak

kerajaan Negeri Selangor dengan disaksikan oleh Raja-Raja Melayu dan Ketua-Ketua Negeri.

7. Penyerahan Kawasan Kuala Lumpur seluas 4,391 hektar ini kepada Kerajaan Persekutuan adalah bersandarkan faktor bahawa Malaysia perlu memiliki sebuah ibu negara yang strategik serta mempunyai kemudahan serba lengkap. Ia juga melambangkan simbol **perpaduan, keamanan dan keharmonian rakyat Malaysia yang berbilang kaum, budaya dan bangsa yang boleh saling bertoleransi dan bekerjasama demi Negara yang kita cintai ini iaitu Malaysia.**

8. Dua (2) lagi penubuhan wilayah iaitu Wilayah Persekutuan Labuan dan Wilayah Persekutuan Putrajaya pada 16 April 1984 dan pada 19 Oktober 1995 telah melengkapkan tiga (3) wilayah dibawah Kementerian Wilayah Persekutuan.

# **PROGRAM WILAYAH**

# **SAMBUTAN HARI PERSEKUTUAN**

YBhg. Dato'/ Tuan-tuan dan puan-puan,  
hadirin sekalian,

9. Pada tahun ini kita menyambut Hari Wilayah Persekutuan buat kali ke-16 dengan tema sambutan yang sama pada tahun lalu iaitu **“Sayangi Wilayahku”**. Pengekalan tema ini

adalah untuk memastikan usaha bagi memupuk perasaan ‘sense of belongings’ kepada warga yang tinggal di dalam kawasan wilayah persekutuan.

10. Bertepatan dengan resolusi **‘Inisiatif Wilayah Peduli, Harapan Dipenuhi’**, sebanyak 29 program melibatkan tiga (3) wilayah dan agensi-agensi di bawah Kementerian telah dirancang dan dilaksanakan.

11. Kementerian berasa amat bersyukur dengan kemasukan PLANMalaysia sejak dua tahun yang lalu. Ini kerana PLANMalaysia merupakan agensi yang sentiasa

memberikan komitmen yang jitu dan cemerlang kepada Kementerian dalam usaha meningkatkan taraf dan kualiti kehidupan warga Wilayah Persekutuan.

**PROGRAM “PLANMalaysia  
BERSAMA KOMUNITI” SEMPENA  
SAMBUTAN HARI WILAYAH  
PERSEKUTUAN PERINGKAT  
PLANMalaysia**

12. Tahniah kepada PLANMalaysia atas kejayaan Program Khidmat Masyarakat di Peringkat Sekolah Wilayah Persekutuan melalui penganjuran **School Outreach Programme - Town Planning Bootcamp** yang mana telah

memfokuskan kepada pelajar sekolah Menengah dalam usaha menyebarluaskan maklumat berkaitan dengan karier sebagai seorang perancang Bandar yang mana profesi ini telah wujud sejak tahun 1921 di Negara kita. InsyaALLAH tahun hadapan maka genaplah 100 tahun kewujudan profesi ini di Malaysia.

13. Melalui program ini, Kementerian juga telah berkolaboratif bersama dengan Kementerian Pendidikan Malaysia di dalam mempromosikan sambutan Hari Wilayah Persekutuan pada tahun ini di peringkat generasi muda yang bakal menjadi pemimpin di

masa depan. Saya berharap kerjasama sebegini dapat diteruskan pada tahun-tahun akan datang.

14. Saya dimaklumkan bahawa PLANMalaysia telah menjemput kesemua sekolah Menengah yang berada di dalam ketiga-tiga Wilayah Persekutuan untuk menghadiri kedua-dua siri program yang telah di adakan iaitu:

- a. di **Sekolah Sultan Alam Shah**, Putrajaya pada 6 Februari 2020 telah dihadiri oleh seramai **400 orang** pelajar dan guru;

- b. di Sekolah Menengah Sains Labuan pada 10 Februari 2020 yang telah disertai seramai **300 orang** pelajar dan guru.
15. Selain dari taklimat kerjaya, PLANMalaysia turut menganjurkan **pertandingan melukis poster** dengan tema “*My Dream City Towards 2050*”. Saya dimaklumkan bahawa Jabatan Pendidikan Wilayah Persekutuan sangat mengalu-alukan tema seperti ini yang dapat meningkatkan kreativiti para pelajar di samping lebih memahami kehendak dan impian generasi muda di Wilayah Persekutuan terhadap kehidupan yang diimpikan pada tahun

2050. Ini juga menepati Teras Ke-6: Komuniti Inklusif dalam Kementerian yang memberi fokus ke arah mewujudkan perbandaran yang berkualiti hidup tinggi dan berdaya saing pada masa hadapan.

16. Selain itu, saya juga ingin mengucapkan syabas kepada PLANMalaysia kerana telah berjaya menganjurkan Pertandingan Pengucapan Awam Peringkat PLANMalaysia sempena Sambutan Hari Wilayah Persekutuan 2020 dan Hari Inovasi PLANMalaysia. Bolehlah hadirin sekalian menyaksikan bakat finalis

pengucapan awam daripada warga PLANMalaysia.

*YBhg' Dato'/ Tuan/ Puan yang dihormati sekalian,*

**WORLD URBAN FORUM 10 (WUF 10)  
DAN MATLAMAT PEMBANGUNAN  
MAMPAN (SUSTAINABLE  
DEVELOPMENT GOALS (SDGs)**

17. Untuk makluman semua, saya bersama pengurusan PLANMalaysia baru sahaja menghadiri **Persidangan World Urban Forum 10 (WUF 10)** yang telah diadakan di Abu Dhabi pada 8 hingga 13 Februari 2020 yang lalu. Persidangan ini adalah kesinambungan daripada persidangan WUF 9, yang

telah diadakan di Kuala Lumpur pada tahun 2018 yang lalu.

18. Persidangan kali kesepuluh (10) yang julung-julung kali diadakan di Semenanjung Tanah Arab ini merupakan platform utama perkongsian berkaitan **agenda perbandaran antarabangsa**. Ia merangkumi enam (6) sesi dialog, lima (5) perhimpunan, 16 rundingan meja bulat, 400 acara ilmiah, 30 sesi latihan teknikal dan juga Ekspo Perbandaran (*Urban Expo*) melibatkan pameran berkaitan perbandaran dari 67 buah negara.

19. Saya juga telah berkesempatan untuk merasmikan ***Soft Launch Malaysia International Day of Happiness*** yang akan dianjurkan oleh PLANMalaysia pada **17 Mac 2020**. Di samping itu juga, saya turut dijemput untuk menyampaikan ucaptama bagi dua (2) sesi *Networking Event* yang membincangkan mengenai cabaran-cabaran yang dihadapi dalam mewujudkan bandar mampan selaras dengan **Matlamat Pembangunan Lestari 2030**.

20. Selaras dengan pelaksanaan SDGs terutamanya **SDG 11:**

**Menjadikan Bandar dan Penempatan Manusia Inklusif, Selamat, Berdaya Tahan dan Mampan**, saya berharap agar kementerian dan agensi-agensi di bawah Kementerian ini dapat melipat gandakan usaha untuk meneruskan agenda 2030, bagi mencapai keseimbangan dalam tiga (3) dimensi pembangunan mampan merangkumi **aspek sosial, ekonomi dan alam sekitar** khususnya berkaitan formulasi dasar-dasar perancangan dan pelaksanaan projek-projek pembangunan.

## **RANCANGAN MALAYSIA KE- 12 (RMK-12) DAN WAWASAN KEMAKMURAN BERSAMA (*SHARED PROSPERITY*)**

21. Meneruskan kelangsungan momentum pembangunan negara, Rancangan Malaysia Ke-12 (RMKe-12) yang akan bermula pada tahun 2021-2025 telah direncana berdasarkan kepada tiga dimensi, iaitu **pemerkasaan ekonomi, kelestarian alam sekitar dan kejuruteraan semula sosial.**
22. Ia adalah kesinambungan kepada pelan-pelan pembangunan yang sebelumnya, digubal berdasarkan kerangka **Wawasan 'Kemakmuran**

**Bersama'** yang menjadi garis panduan kepada pembangunan jangka panjang negara.

23. Sehubungan itu, perancangan dan pelaksanaan projek-projek Kementerian akan dirancang sejajar dengan aspirasi tersebut bagi mencapai wawasan kemakmuran bersama dan kelestarian pembangunan khususnya.

## **PENUTUP**

*YBhg. Dato' / Tuan-tuan dan puan-puan  
dan hadirin sekalian,*

24. Sebelum mengakhiri ucapan, sekali lagi saya ingin mengambil kesempatan ini untuk menyeru semua

hadirin agar menghayati semangat di sebalik sambutan Hari Wilayah Persekutuan ini dengan mengambil peringatan atas pesanan Allahyarham Mantan Perdana Menteri ke-2 pada 46 tahun yang lalu. **“Semoga Wilayah Persekutuan kekal menjadi simbol kepada PERPADUAN, KEAMANAN dan KEHARMONIAN rakyat Malaysia”.** Justeru, marilah kita bersama-sama berusaha untuk mengekalkan semangat perpaduan, keamanan dan keharmonian yang kita nikmati hari ini yang mana ia adalah hasil pengorbanan pemimpin-pemimpin masa silam.

25. Saya berdoa agar PLANMalaysia terus sentiasa berada di landasan kecemerlangan dan sentiasa di hadapan sebagai peneraju utama perancangan bandar dan desa ke arah mewujudkan persekitaran kehidupan yang berkualiti, sejahtera dan mampan.

26. Sekalung penghargaan juga kepada semua para guru dan pelajar-pelajar yang telah menjayakan *School Outreach Programme - Town Planning Bootcamp* dan anak-anak yang hadir pada petang ini.

27. Dengan lafaz ‘Bismillahirrahmanirrahim’, saya

**merasmikan Majlis Sambutan Hari  
Wilayah Persekutuan Peringkat  
PLANMalaysia bagi Tahun 2020.**

Wabillahi              Taufik              Walhidayah  
Wassalamu'alaikum      Warahmatullahi  
Wabarakatuh. Sekian, terima kasih.